

# O LE SULU SAMOA



EKALESIA FAAPOTOPOTOGA KERISIANO SAMOA  
O LE NUSIPEPA FAA-LE-LOTU NA FAAVAEINA I LE T.A. 1839



**FAAVAEINA 1839**

**O LE SULU SAMOA**


**AOKUSO 2019**

email: [sulusamoa@cccs.org.ws](mailto:sulusamoa@cccs.org.ws) -Main Office: Ph. 24414, Ext 30 - website: [www.cccs.org.ws](http://www.cccs.org.ws)



## ***FALE IUPELI I MALUA***

**“Faaaliga o le Mana o le Silisili Ese”  
“Revealing the Power of the most High.”**



# FAASINO UPU

1.	FAASINO UPU	2		
2.	LAUGA	2	-	4
3.	PEPA FONOTELE 2019	5	-	6
4.	PEPA MAFUTAGAMATAGALUEGA LOTOFAGA-LEPA-ALEIPATA	7	-	10
5.	FETU'UTU'UNAIMUNIAO	11		
6.	AUMAI - AVATU	12		
7.	ARETO MO LE AGAGA	13		
8.	<u>O E UAFAILAGILE FOLAUGA</u>	14	-	16
	1. Falelima Nora Vaega Aati			
	2. Sauimalae Savaiinaea Samoa Sofara			
	3. Toloa Tapunuulenuu Afoa Ailepata Totoe Papua			

## O LE LAUGA

**TUSI PAIA :- KENESE 14:14 – 24 / GALUEGA 13 : 1 – 3**

**MATUA : KENESE 14 : 22 – 23**

*"A ua tali atu Aperamo i le tupu o Sotoma ...Ua si'i lo'u lima i le Alii, le Atua Silisili Ese , e ona le lagi ma le lalolagi , ou te le avea lava si na manoa po'o si na nonoa seevae, ou te le avea lava si na mea i au mea uma, ina ne'i faapea a oe, ua mau'o'a Aperamo ia te a'u."*

**MANATU AUTU:- "O LE GAGANA A LIMA"**

- FA'ATALOFA O LIMA - o le gagana o Feiloaiga ma Feofofoaiga

- PATIPATI O LIMA - fiafia, faamalo, faafetai

- TA-ALO LE LIMA – faamalo, faamanuia atu, faamanuia mai

- U'U O LE MOTO – gagana o le misa

- FA'ALO (salute)- gagana o le faaaloalo Faa-le-Malo

- FA'EE O LIMA –gagana o le faapaiaina ( Sauniga Faa-Ekalesia)

Atoa ma le tele o mau taaga a lima e faagaganaina ai le mau fesootaiga a le isi tagata ma le isi. O lona uiga e tofu taaga a lima ma ni feau o loo momoli atu ai ni feau e fesootai ai tagata. E ese le mataina o talanoaga a nai tagata gugu ma logonoa pe a fai o latou lima .

Sa fai foi lima o Aperamo. Fai mai le matua .." Ua si'i lo'u lima i le Alii le Atua Silisili Ese. O le si'i o le Tautoga. O le si'i o le lima, o le faatinoga e faailoa ma faamaufaailogaina ai se tautoga. I le va o le tagata ma le Atua, atoa ma le tagata ma le isi tagata.

O le Tautoga – o se tautinoga ua faia ma le mafaufau lelei, ua i ai atoa le loto ma le agaga o le tagata, ma ua nofo sauni foi i lona malosi e faataunuu mana'oga o le mea ua tauto ai. O lona uiga o le si'i o le lima i le tautoga, o le gagana o le mea ua i le loto o le tagata na te faia mo lona Atua atoa foi ma le isi tagata .

O le Tusi o Kenese 14, o loo faamatalaina ai le taua i va o tupu e toafa sa i le tasi itu taua, ma tupu e toalima sa i le isi itu taua.

# O LE LAUGA

Sa malolosi tupu e toafa o Amarafilo le tupu o Senara, Arioka le tupu o Alasara, Titalu le tupu o nuu o Koima, sa ta'ita'iina e Kitalaoma le tupu o le nuu o Elama. Sa latou faasaga tau atu ia Pira le tupu o Sotoma, Piresa le tupu o Komoro, Senapo le tupu o Atama, Semepo le tupu o Sepoiima ma Soara le tupu o Pala.

E sefululua tausaga o nofo pologa nei tupu e toalima ma totogi atu lafoga ia Kitalaoma le tupu o Elama. O le tausaga e sefulutolu na foua ai e nei tupu le pule sau a Kitalaoma ma latou taofia ai le totogi atu o lafoga i lona malo. O le mafuaaga lea o le sii taua mai o le tupu o Kitalaoma ma tupu sa au faatasi ma ia, ma latou fafasi ma faatoilalo ma faoa uma oloa ma mea uma taua sa i nei tupu e toalima ma latou ave faatagata o taua le tele o tagata o ia nuu.

Ina ua tetea Aperamo ma Lota, ona alu lea o Lota ua nofo i aai o Sotoma ma Komoro. A o nuu tonu ia ua faasaolo uma ai Kitalaoma ma tupu sa ia te ia . Ona avea ai lea o Lota ma lona aiga atoa ma ana mea uma sa ia te ia .

Na logo mai le tala ia Aperamo i le mea ua tupu ia Lota le atalii o lona uso, ona tuliloa lea e Aperamo ma tagata e 318 na a'oa'oina lelei i taua sa ia te ia . Na maua atu e le tuliloaga a Aperamo ma latou tau ai le taua ma manumalo ai o ia i au a Kitalaoma . Na latou toe

laveaiina ma toe faafoi mai o tagata sa avea, e aofia ai ma Lota ma lona aiga. Na latou toe maua mai foi o oloa uma na faoa.

Ua foi mai Aperamo ma le manuia ma ua tala leo malie le a'e malo o le taua, ona feiloai lea ma Mekisateko le tupu o Salema ma na avane o areto ma uaina ma ia faamanuia ia Aperamo. Ua ia faafetaia le Atua o le na ia tuuina mai ona fili i ona lima. Na foai atu e Aperamo o mea e sefulua'i o mea uma sa ia te ia ia Mekisateko, aua o ia o le tupu o Salema, a o ia foi o le faitaulaga a le Atua Silisili Ese. O le uiga o le igoa Mekisateko –o le tupu amiotonu ,O le tupu o Salema, o lona uiga o le tupu o le filemu. Pe le o ata lafoia ia o le Atua ma lona malo? Aua o le malo o le Atua o le malo o le amiotonu ma le malo filemu.

Ai foi o le fiafia tele o le tupu o Sotoma ina ua toe maua mai o ona tagata ma oloa uma na faoa, o le ala lea na alu ane ai ma fai ane ia Aperamo ...."Tuu mai ia ia te au o tagata, ae ave uma ma oe le oloa". Peitai na tali atu Aperamo ia Pira le tupu o Sotoma ... "Ua sii lo'u lima i le Alii, le Atua Silisili Ese ....ou te le avea lava si na manoa poo si na nonoa seevae, ou te le avea lava si na mea i au mea uma, ina nei faapea a oe, ua mauo'a Aperamo ia te au."

O lima ua sii ona o lana tautoga i le Atua ma le tupu o Sotoma na te le avea lava si na mea mai mea e tele ua ofoina atu mo ia ...e oo lava i si na mea itiiti ma

faatauva. O le manoa poo le nonoa seevae, e faatusa i ai mea itiiti, faatauva ma le le aoga, aua e fesootai ma le eleelea, palapala, ma le agasala .

Fai mai upu a loane le Papatiso e uiga ia Iesu.."E sili le mulimuli mai ia te au, ou te le aoga ona ou tatalaina i le nonoa o lona seevae. O lona uiga e oo lava i le galuega pito maulalo ma faatauva, e le agavaa ona ia faia mo Iesu"

Pe aisea lava ua le talia ai e Aperamo le mea ua ofoina atu e le tupu o Sotoma? Ua le sili ia Aperamo nisi oa e foai mai, nai lo le alofa o lona Atua ua na faatoilaloina ai le fili. Ua malie lona loto i le pule agalelei a le Atua fai mea sili ua aumai ai le manumalo e le faatusaina i se isi tamaoiga e foai mai. Sa faatuatua pea Aperamo i le Atua ua ia tauto i ai ...o le Atua e paia, silisili ese ma mamalu malosi ma matautia, o le Atua e le mativa i se mea mo e faatuatua ma faalagolago ia te ia. Sa sili le naunau o Aperamo i le tamaoiga Faa-le- Atua, nai lo se oa faa-le-lalolagi e ofo mai e le lalolagi faapaupau. Ai lava sa musu Aperamo ina nei moe le koli i fua, ae le o ni ona fua. Fai mai Aperamo ..."ina nei faapea a oe ua mauoa Aperamo ia te au"

O lona uiga o le sii o le lima o Aperamo, o le matua tautino atu ia Pira, e sili lona Atua, e pele ia te ia lona Atua , e faamaoni lona Atua na te tausi ma foai mai mea mo ia . Ua faaalua foi lona aao malosi ina ua manumalo i le taua sa tau ai. O le laveaiina mai o Lota ma lona aiga ma tagata uma sa latou faatasi, o le taui pito sili

# O LE LAUGA

lea ua aumai e lona Atua ...ua lava lea. Ua tofo malie ma ua inu malie i le alofa o lona Atua. O le ala lea o le fai ane.. Ua sii lou lima i le Atua Silisili Ese e ona le lagi ma le lalolagi.

O le tagata ua sii lona lima i le Alii, e le masalosalo, e le toe faalotolotolua. E le palaai pe solomuli. E le maileia gofie pe faalavelaveina e le tiapolo i ana faiga faatosina lana tautoga ua sii ai lona lima i lona Atua. Ua maua ma mausali lona loto i le Atua na te fesoasoani mai . E le faafeina e ni malosi foliga matautia e faamalumu mai . E le femoumouai lana tofa ma le faautaga, ae faatali timu i le Atua ma lona Agaga Paia, o lona malosi lea

Le Ekalesia, o le tatou valaauina mai le Atua, ia tatou faailoa lona finagalo paia i le lalolagi. Ta molimau lana Faaolataga ma momoli lona alofa le faatuaia i soo se tafa o le soifuaga ina ia ola agaga mo lona Malo. Ua sii o ta lima i le Alii e fai i tatou ma ana molimau. I le lalolagi pogisa ona o le agasala. Ua sii o tatou lima e tetee atu i faiga faamalosi ua faaofiofi mai na te pulea le lotoifale o le Galuega paia a le Atua. Ua sii o tatou lima e puipui le mamalu ma le paia o le Ekalesia a Keriso i le lalolagi ma faia lana galuega faaola e ala i tofi ma tiute, faiva ma galuega eseese ua valaauina i ai i tatou.

O le upu moni, e i ai taimi e faigata ai ona faataunuu mana'oga o le mea ua sii ai o tatou lima . E mo'omia lo tatou

lototetele ma le faatuatua i lona mana.

Fai mai le Toeaina o Leota i lana fanau e toatolu, e o mai e susunu le fale ina ia mu ai le ma'i leaga sa mafatia ai le alii, ina ia maua ai sona mapusaga. E le'i mafai e tama o Togi ma Po'e ona fai le mana'o o le toeaina ona e alolofa i lo Tama. Na o le tama mulimuli o Matuu, e ui ina alofa i lona Tama, ae na usitai ma susunu le fale. Na mu le fale ua tea ai le ma'i o le toeaina ma ua toe malosi ai. O le fiafia tele o le toeaina i lona atalii, na ia faapea ai ..."Ua malie le sua a Matuu"

E ui ina faigata faaiuga ua sii ai aao o le Ekalesia, ae o le tatou faatuatua, ma lototetele i le malosi o lona mana, tatou te aumaia ai le mapusaga i le lalolagi fememeai . "Ua malie le sua a le EFKS".

Manaia lima o le Ekalesia i Anetioka, fai mai na sii lava i le Atua i le tatalo ma le anapogi ma saili i le finagalo o le Atua ....seia oo ina fetalai mai le Agaga Paia i le Ekalesia ..."Totofi ia mo au o Panapa ma Saulo i le galuega ua ou valaauina ai i laua". E tali ma faaali ma fetalai mai lava le Atua i lana Ekalesia e si'i atu lima ia te ia ma le loto faamaoni .

Na ofo ane ma si'i ane lima o Anania ma Safaira ile au aposetolo o le a faatau le fanua ma tuuina mai le tupe i le au aposetolo mo le galuega a le Ekalesia. Peitai na la nana nisi mea. Ua le faamaoni i le mea na si'i ai le lima i le Atua e ala i le Ekalesia. Ua faaoleole i le Atua. Ua le faamaoni i le Atua...lima leaga na .

Tele tagata e pei ua faataaloga i vai le soifua tapuai i le Atua. E taalo i mea o sii ai lona lima i le Atua ma lana Ekalesia. E manatu mama i mea na te ofo atu ai i le Atua ma lana Ekalesia. E le ulagia le Atua. E le ose vaaiga e fia manatua le mea na oo ia Anania ma Safaira, ae o le fafagu lea i le soifua auauna ma le ola ofoina atu...O loo faamanatu mai ia i tatou, e mataga le taunuuga o le tagata faaoleole ma le le faamaoni ile Atua ma lana Ekalesia . O le tagata kerisiano moni, ia muai si'i atu lona loto i le Atua. Ia faamaoni ma faapaiaina.

Na si'i i luga lima o Mose ae taofi e Arona ma Huro, ina ua vaivai le toeaina a o tau Isaraelu ma Amaleka, seia oo ina po ma manumalo ai Isaraelu. Galulue faatasi ona tatou iloa lea o le mamana o le Atua i a tatou feau. Fai mai le Fai Salamo ...O ai ea se e alu a'e i le mauga o le Ali? O ai se tumau i lona afioaga paia . O le ua i ai lima mama ma le loto mama . O le ua le naunau lona loto i le mea faatauvaa, ma ua le tauto faaoleole...na te maua le manuia mai le Alii"

O aao o le Atua, o aao o le alofa, faamalolo, faamanuia, aao laveai ma faamafola e faamalie le manao o mea ola uma. Aao o Keriso na masaesae i le satauro. Na tuia i fao ma lona itu na tutui i le tao ina ia tatou maua se soifuaga filemu ma sao atu ai i le manuia o lona malo e faavavau.

Amene.

**Saunia:**

**Alapi Tapusoa Eti (FS)**

**EFKS Ierusalem Fou,**

**Tafuna, AMERIKA SAMOA**

---

# **“Faaaliga o le Mana o le Silisiliese”**

## ***Revealing the Power of the Most High***

---

**Pepa Fono Tele 2019**

**23 Me 2019**

**AUTU: “FAALIGA O LE MANA O LE SILISILIESE”**

1. (a) O le Aso Gafua 20/05/2019 le folamua na faaeava i Malae. O le auafa mau sa ta’ui, teu ma afifi i Maluapapa, e leoleosa’i ma puipui e Malua e ala i le folasaga manino a le Fomai Faiaoga, se’i faafeiloai faatalofa ma faamafanafana i le taupeau mai o le Ekalesia Aoao ona o lana Fono Tele o lenei foi Tausaga 2019.

(e) O le Segisegi o le taeao, Aso Lua 21/05/2019 na lafoia ai ataata o ao Sinasina o le Ekalesia ma aveva ai le Susuga i le Toeaina e fai ma sui o le Itufale o Tamā, se’i faasaō ma faalelei i le faa-tali-mau o Malua ae le gata i lea ao le aoao o le Ekalesia. O le faalaeiau i le fesagisagia’i o fanau a le Atua ua fetaiia’i i manuia.

(i) Na se’i ananafi laufono faapipii i le Faletua o le Toeaina Penisione, o le usugafono a le Mafutaga malosia Tinā se’i saga apelepelea ma fatufatu manū ma matagofie auā le Ekalesia. O le pae ma auli e aulelei ma lauusi ai la’au o le faatoaga. O le Tovine a le Atua o loo fa’aalia pea lona mana i aso uma, ia maua pea ma fua lelei e viia ai lona Suafa.

(o) Ua valaauina lo’u tagata faatauavaa e foliga e taualuga i ai le au fai Pepa o lenei Fono Tele 2019. E lolo-matau-ama se taofi, ae tafea faa-i’a e alu i le faalolo le vaivaiga, ona e le tusa ai. Auā o le Mataupu silisili mo i latou ua aotauina ai, a’o le faalogologo lava mo i matou e le’i oo iai. O le li’a lea o lagona e faaeteete tele i ai ma mafua ai ona tumau lo matou Talitonuga.

**“E le sopo lava le tai i le eleele; E le la’a foi le uto i le maene.”**

2. (a) Ua laulau-vivilu le Fono Tele i le Autu o le Fono Tele o lenei Tausaga.

**“Faaaliga o le Mana o le Silisili Ese.”** O le alaga lea a le Talalelei.

Ae sei fesili lava i le alaga a le Atunuu a’o le’i taunuu mai le Talalelei, pe ni a fa?

**“E! Tagaloa e, E! Tagaloa e, ta fia malolo. A ta lili’a i peau i lalō.”**

O le fesili. O le alaga, ae aisea? Le faaaliga o le mana o Tagaloalagi na valaau iai Tuluiga na usu ia Tupuimatagi le alo o tagaloalagi. O Tala-tuu o Samoa o lo’o faaaliga ai le mana o le silisili o atua o Samoa.

(e) Malietoa i lana Sailiga-Maloia Nafanua. Se’i saili i le mana o Nafanua e tali mai i le mana’o. Ia faailoa maia se Ao o lona Malo.

(i) O le faataumua-āva mai o le Savali o le Filemu e se’e mai i peau taoto, ae ua lē o galu fatio’o i le gatai-fale o Samoa, sa faafeao mai lava e le popole, le gatete ma le atuatuvaale o Faueā ma Puaseisei, ona o le logologoa ma le mūsaesae o le afi o le sauā o Tamafaigā. Na fetai i le vasa ma tautai o Samoa ona le to’a lava lea o Faueā ma fesili lē masani ai lava i ia tautai. “Alii e, tou te silafia, o a mai Tamafaiga?”

O le malosia o le va’a na lē malepe ai i le osooso, patipati ma le taufonō a Faueā. - **“Ua mate le Tevolo, ua mate le tevolo.”**

(o) Ua afe le Savali ma tuta i Sapapalii, peitai e le o iai le alii. Na aami i upolu ma logo ai le alii. Faafofoga i le Malelega: “Samoa e, faautu ia le toto masa’a. Ua malotia Mataniu Feagai ma le Ata. Fai mai o Alii papa’e ma le latou Lotu.”

Faaaliga o le Mana o le Silisili Ese. Ua faatino le valoaga a Nafanua le Perofeta Fafine.

3. (a) Afai e asiasi le leo pe fai se manatu o le Tiakono i le Talalelei ma lana Mataupu Silisili,

---

# PEPA FONOTELE MALUA 2019

---

## “Faaaliga o le Mana o le Silisiliese”

### *Revealing the Power of the Most High*

---

ua tautino lava le Solo a le Tamaloa Faasaleleaga ae ui lava i lea, tau ia ina se’i pa’i i vai o le tama, ona gata ai lea o le gagana.

(e) **“Faaaliga o le Mana o le Silisili Ese.”** O le fesili-

(i) O le a le molimau a Kenese? Na faia e le Atua le lagi ma le lalolagi i le amataga – Kenese 1:1 Ua tino mai le faaaliga o lona Mana.

(ii) Ona faia lea e le Atua o le tagata i lona faatusa, O le faatusa o le Atua na ia faia ai o ia, na faia e ia o i laua, o le tane ma le fafine.

(i) Le Isaraelu e le fiu mata e va’ ai i le fa’aaliga o le Mana o le Silisili Ese. Ua fia ni laveai? Ua fia ni faamagalo? Ua fia ni vavega ua faa-va’ ai iai mata? Ua fia ni alofa? Le Ekalesia e, pe le o i tatou ea o le Isaraelu faamalie gata o iai nei? Va’ ai ae leiloa, Faalogo ae le lagona?

(o) Na matua pupula iai mata o Farao i le Fa’aaliga o le Mana i lona finagalo e tu’u Isaraelu e o.

(u) Na fiu Mose i le la’au na mu ae le faaumatia, le feau na aumai e alu e aumai le nuu o Isaraelu. Na sisi’o i le leiloa tautala. Fai mai le Mana – Alu, ou te faagaganaina oe. Ō ma Arona. **Ua faaaliga le Mana o le Silisili Ese.**

(f) Na pupula iai Elisaia a’o aveina a’e Elia i le lagi. II Tupu 2: 11 - 12.

**Faaaliga o le Mana o le Silisili Ese.**

E leai se malosi na te mafaia le ea, ea, a’e o Elia.

4. (a) Ua afio mai le Silisili Ese o Silisili ma Fa’aaliga o lona mana. Le fa’aatoaga o le faaolataga e le toe sō’oa. E le’i mafai e le malosi o tagata leaga, le satauro, le tuugamau na foa i le papa, ona manumalo iai. Ua faaumatia ma nutipalaina ina ua fa’aalia le Mana o le Silisili Ese.

(e) Na matuā fepulafi iai mata o Peteru ma nisi o le Au Soo na totoe i le sisii a’e o ona aao, faamanuia ia i latou uma ma afio a’e i le lagi.

(i) Faaaliga o le Mana o le Faaolataga o le Silisili Ese. Poo tatou lagonaina ea? Ua fa’aalia le Mana o le Faaolataga. Po’o tatou talia ea? O a ni fua o le talia?

5. (a) Le Ekalesia e, o le molimau moni, ua matua le Talalelei i laufanua o Samoa. Ua 189 tausaga o le EFKS. Ua matuā matua, matua lava. Ua fola i Malae, tuugamau i le vasa, leiloa i atunuu ese i latou na āsaina le gasū o le taeao. O loo fa’auau pea le galuega faa-Misionare i le Pasefika, Europa ma Asia.

O le Manulauti, ia saga faailoa, ma faamalalalama le Fa’aaliga o le Mana o le Silisili Ese. Faafetai ma faamalo le loto tetele.

A’o polepolega o le Taofi – E! Talofa e, Talofa i le Faleaitu a le

Toeaina Faleata – I ta i o, ta i o ae le matamata...

(e) **Pine o le Atugaluga:**

O le Tusigaigoa a le Atunuu o lo’o talu ai nei, toeitiiti pipii mai le faitau aofai o isi tama’i lotu ia e leai ni taeao, i le faitau aofai o le EFKS.

(i) Ua faatupula’ia le faafitauli o le Sauāina o Tinā, fanau iti ma fanau teine.

(o) O le a le va’ ai i le faasāsala atu ae o faatutū mai isi lotu fou ma taena’i atu iai ma mamoe o le Faaolataga? O le talia ea lea o le Fa’aaliga o le Mana?

(u) O le a le Tapenaga faa-Misionare i le lolofi mai ma le a’e o le anoano o tama’i tapuaiga ua i le atunuu? O le a se fofō o le mau tapuaiga o lo’o uluulufale solo i totonu lava o nu’u, ua o’o lava i Nu’u mavae, ua faasoloatoa. E le o se faatagi-mata ia aga?

6. **Upu Faaiu:**

(a) O le faapouliuli mai o le Tulafono e fia saili lona amiotonu i le Faamasinoga ma avatu iai sana Faaiuga, tatou tatalo pea ma fesili i le Faaaliga o le Mana o le Silisili Ese, ia to Manū mo le Ekalesia.

(e) O le aga i le Tauafiafi o le fonou usu a le Ekalesia i lenei foi Tausaga. O Iesu Keriso lava le Ao o le Ekalesia le Afuamea, o Ia foi le Faaiumea.

**Soifua:**

**Vaatiuola Lautolo Misi (TT)  
Matagaluega Aana**

---

# **PEPA MAFUTAGA MATAGALUEGA**

---

## **LOTOFAGA-LEPA-ALEIPATA 2019**

---

### **SUESUEGA TUSIO IOSUA**

#### **FAATOMUAGA:**

I le agaga maulalo e faatalofa atu ai i Susuga i Toeaina ma Faletua, paia o le Aufaigaluega tofofi ma faletua, faapea le paia lavaloa o le tatou matagaluega. Molimauina le soifua manuia o lo tatou aiga matagaluega. O lou soifua sa e filifili ai e auauna ai i le Alii, afua ai le soifua faaauau. Ua tatou feiloai i ao o lagi matafi ae leo le tulouna a le lagi. Faafetai ai i le Atua, o Le sa auauna iai lo tatou aiga. O lenei pepa o le a taumafai lava i vaega ua mafai ona faamauina i le tusi o Iosua aemaise lava le vaaiga lautele faapea nisi o faalumaga tāua o loo a'oa'o mai ai Iosua.

#### **Suesuega i le Tusi a Iosua**

#### **Iosua le Tauola:**

O Iosua o le tama na tupu mai i le a'a o le aiga o Efaraima (Num 13:8). O le tasi nei o taulealea mai le **toalasi o le aumaga** a Isaraelu sa tuavae i ai Mose, ao tau fatifati mai se ala o le nuu o le Atua i le vao. O le ala-fati sa ta'ita'i mai ai e le ao faaniutu i le ao, ma le afi faaniutu i le po. Na vavao e Mose le nuu i le auvae mauga o Sinai, ae alu ae i le tumutumu lea na tuuina ifo ai tulafono. E alu la Mose ae vaai mai o loo iai le taulealea o lo tamoemoe atu i ona tua, o ia lea o Iosua. O se taulealea sa usitai ma faalogo ia Mose. O se taulealea sa taulamua. O se taulealea sa faaaoga lona malosi mo le Atua. O se taulealea sa vaai ona mata

faalogo ona taliga, lima ma vae iai faatonuga a Mose.

O le uiga loloto o ia mea. O Iosua o le taulealea sa ia asu le ipuvai ma tutu le afi aua le Atua e tauala atu ia Mose. Lea la ua moeiini atu mose, ao lea ua tumu le ato a Iosua i faatufugaga o le galuega faa-ta'ita'i. Ua sauni Iosua e amo ato i faatufugaga na ala mai ai Mose. E au le tauola e au le fagota.

O le tulai mai o Mose sa fai lea ma faleaoga ia Iosua, o se ta'ita'i sa lalafu mai ai momoga faa-le Atua aua le galuega faaauau. E taua foi leaga o nisi ta'ita'i ua soona tu'ulafoai, ma ua le soa i le Atua le ta'ita'iga, ona afaina ai lea o le galuega tu'ufaasolo e pei ona iai le sosooina o le fau ma le fau i le va o Mose ma Iosua. E faapei ona soa i le Atua le taupulega a Mose, e manatu ua faapena foi le agaga o le ta'ita'iga a sauni atu iai Iosua mo le fu'a faatini, e taunuu ai le tamoega umi mo le nuu na folafolaina.

#### **VAAIGA LAUTELE**

Ua sauni Iosua ma le nuu e asa le vao filifili o le ala i totonu o Kanana. O le mea mautinoa e ui ona o le nuu sa folafolaina iai e le Atua, peitai e toai atu Isaraelu o loo aumau ai tagata. O le mau lava ia ua silafia lautele. O eleele ma fanua, o aseta taua ia e faamemelo iai soo se tagata. E faapena foi le mafuaaga sa iai latou sa nonofo i Kanana. E le faigofie la ia Iosua ma Isaraelu ona faamau lana pule ia Kanana, leaga e saili i le malosi, o le tao ma le pelu ma le talipupuni.

O le ala lea na ui atu ai le malosi o le Atua ia Iosua ma Isaraelu, ao le auupega sili lava la e tataua ona tamau ai pea Isaraelu o le **faatuatua ia moni ma faamaoni**.

Ae malie aua o le ala foi o Isaraelu i Kanana, e ui atu i totonu o nisi nuu lea na amata atu ia Ieriko. Ae maimau e pe ana mafai ona pei o tatou e mafai ona soalaupule ma faia i le va fealoaloi. Auā e mafai lava ona faanoi fofoga-*sei matou ui atu a i le tou fanua....* I le aotelega la i le tusi o Iosua ma le agai atu o Isaraelu i le nuu folafolaina. E leo se galuega e faigofie, o le galuega e manaomia ai le **tumau o Isaraelu i le Atua**, leaga o le polokalame a le Atua lea e fai ma ta'ita'i tama. O le mea moni e mafai ona faapea i le agai atu o Isaraelu i Kanana ua nao se **sui momo'e**, ao le Atua o le a ia tau le taua mo Isaraelu.

#### **FAAMOEMOE:**

O le igoa Iosua e uiga tutusa ma le igoa Iesu – O le Atua e faaola mai (God saves). O iina foi o lo o faamalumalu mai ai se faamoemoe taua o loo galue mai ai le Atua i lona nuu o Isaraelu. O le alofa fai paaga o le Atua ma Isaraelu, lea na le gau ai le tao ma agiagia pea le fu'a o le manumalo ia Isaraelu i le malosi faafitafita. O lea lava e tumau le feagaiga o le **Atua mo Isaraelu**, peitai e tataua foi ona **Isaraelu mo le Atua**. E faaola e le Atua lona nuu pe a tumau lo latou faatuatua faamaoni.

#### **ANOTUSIO LE TUSI:**

---

# **PEPA MAFUTAGA MATAGALUEGA**

---

## **LOTOFAGA-LEPA-ALEIPATA 2019**

---

### **Mataupu 1: Ua tofia Iosua e ta'ita'i le nuu i Kanana.**

*Tau ina e faamalosi ma loto tele, ia e anaana i tulafono, aua e te alu ese ai i le itu taumatau poo le itu tauagavale.* Finagalo lea o le Atua e lima ta'ita'iina ai le tulai mai o Iosua. O le valaauina e le mana'omia ai le se ese mai ala o le Atua e pei ona sa to'o mai ai le sa o Mose ma Isaraelu. O nisi o upu o loo faapea mai...*aua e te fefe...*O le galuega faa-ta'ita'i e le mana'omia le fefe, e mana'omia le toa o le loto ma ia o faatasi le avefa ma ta'ita'i ma le amio e tataua. O le valaauina lava ia o Iosua ua uma ona faalanu e le Atua i lona mana silisili ese, le ala lea na le maluia ai le ta'ita'iga a Iosua i se isi lava malosia.

### **Mataupu 2: Raava ma Tagata asiasi faalilolilo e toalu.**

Na faalogo lenei tinā o Raava na savavali Isaraelu i le alititai matutu. Ona avefa lea o le faalogo a lenei tinā e fai ma tala lelei, e momolia le talitonu i lona loto ma le mafaufau, e moni ma faamaoni le Atua o Isaraelu. O le tali leleia e lenei tinā o tagata asiasi, o le ala lea o le faaolataga mo ia ma lona aiga. O le fu'a mūmū ua faatonuina e fai ma faailoilo, e faamoemoe tutusa ma le toto na vali ai pou o fale o Isaraelu i Aikupito lea na sopoloa ai le toasā o le Atua mai fale o Isaraelu. Auā ua na'o Raava

ma lona aiga na faasaoina mai ina ua soloia pa o Ieriko.

### **Mataupu 3: Ua oo le nuu i le vaitafe o Ioritana.**

Ua amata ona mamalu le ta'ita'iga a Iosua i faailoilo o le mana auai o le Atua. Ua savavali Isaraelu ma le atolaau a le Atua i le Alititai o le vaitafe o Ioritana faapei ona faia i le sami ulaula. O le vaitafe o Ioritana o loo fai ma tuaoi e ta vavae ai le Isaraelu ma mausolo i le vao ma le Isaraelu ua i o latou laufanua na folafola iai e le Atua.

### **Mataupu 4: Ma'a Faamanatu e 12**

E lua ma'a faamanatu na faia e Iosua – o le tasi i totonu o le vaitafe o Ioritana i le alitivai na savavali ai Isaraelu ma le tasi i kilikala i le nofoaga sa toluapi ai. O le faamoemoe o nei ma'a, ina ia manatua ai pea vavega ofoofogia na faia e le Atua mo Isaraelu, ae le gata i lea e faailoa ai ia Isaraelu o le alofa o le Atua ia Isaraelu o le alofa e faia pea.

### **Mataupu 5: Faaperitomeina/Paseka Muamua i le nuu folafolaina**

O nisi o fanau a Isaraelu sa fananau i le vao e lei peritomeina e tusa o le aganuu ma tulafono o le faamamaina faa-Isaraelu. Lea la ua faatonuina ai e le Atua Iosua ina ia faia e tusa o le agaifanua. Na to lauapi i Kilikala na faia ai le aiga o le paseka e saga faamanatu ai pea le alofa fai vavega o le Atua.

### **Mataupu 6: O le siosioina o Ieriko**

O le faatoilaloina o pa malolosi o Ieriko o le faaalua lea o le mana silisili ese o le Atua. Ua iloa atu e Iosua ma Isaraelu atumauga maualuluga i le itu i matu i sasae, o le ogatotonugalemu lena o Kanana. O atumauga ia lea o mana'o Iosua e fia taunuu iai e faigofie ai ona pulea Kanana. Peitai o le mea lea e tupu, o lea e pito mai luma Ieriko ma ona pa malolosi. Manino le tala i le solo ai o pa o Ieriko. Ao le ta'ua ai o le numera fitu i le mataupu lea – o le faaalua lava o le atoatoa o le mana laveai o le Atua mo Isaraelu, ma le manumalo a'ia'i o Isaraelu.

### **Mataupu 7-8: 29: O le agasala a Akana ma le malaia na tupu ai.**

Na pei e manatu faatauvaa Isaraelu ia Ai ona o le toaitiiti, peitai na avefa le toaitiiti ma ala na liu suavai ai le malosia ona ua pei ua leai se malosia mai le Atua. E lei tupu fua ia mea, auā na silafia lelei e le Atua le agasala a Akana ina ua ia avefaanana le vete mai le aai o Ieriko. Mulimuli ane, e tauia le agasala ae tumau le alofa o le Atua mo Isaraelu. O le Atua faamagalalo na afua ai ona toe faatoilalo e Isaraelu Ai ma ana fitafita malolosi.

### **Mataupu 8:30 – 35: Faamauina tulafono i le mauga o Evalu.**



# PEPA MAFUTAGA MATAGALUEGA

## LOTOFAGA-LEPA-ALEIPATA 2019

O le toe faamauina o tulafono ole faataunuuna lava lea o le faatonuga sa faia e Mose ia Isaraelu ma ona ta'ita'i (Teuteronomie 27:4)

### Mataupu 9-10: Ua tumau le Ia.

Ua oo atu le malosi o le mana o le Atua o lo tau ai Isaraelu i le aai o kipeona. O Kipeona e i le itu i Matu Saute pe a ma ma le 6 maila mai ia Ieruselema. O se aai e fai lava si tele, peitai e lei mafai lava ona sao mai i le mana auai o le Atua sa ia Isaraelu. O le toatele o kipeona lea lava na tatalo ai Iosua i le Atua ina ia tumau lona la i luga o Kipeona ma le masina i le vanu o Ailona, sei faa-mae'a lelei le faatoilaloina o fitafita Kipeona.

### Mataupu 11: Faatoilaloina nuu o le itu i matu

Ua uma ona faatoilalo nisi o tupu o le itu i Saute e pei ona iai Kipeona, ao lea o le a faasolo atu Iosua ma lana autau agai i le itu i matu. Manatu Iosua e toluapi i Meroma e faigofie ai ona latou maua uma ai laufanua. O le alafua lava ia a Iosua ina ia ta vavae ese mai le itu matu ma le itu i saute, ona osofai lea o le ogatotonu ina ia faigofie ona pulea atoa itu uma o Kanana. Ua tau malosi pea Isaraelu ona o le mana auai o le Atua.

### Mataupu 12: O Tupu na Fasiotia

O loo faamauina ai tupu e 31 o atunuu taitasi sa faatoilaloina e Isaraelu. Lea lava ua faana'e mai le tai o Isaraelu i laufanua o Kanana ma ua taitasi ma nofoia


laufanua o le nuu folafolaina. Aua tumau pea le malosi o Iosua ona o le malosi lilo o lo aiaili mai tua.

### Mataupu 12-22: Vaevaega o laufanua o Kanana.

O le vaega lea o le tusi o loo faamauina ai le vaegvaega o eleele o Kanana i ituaiga e sefululua o Isaraelu. O le **mataupu tupito** lea o loo faatalitali ai Isaraelu, o **eleele ma fanua o le a fai mo latou tofi e faavavau**. O lea o le a fai tofiga o fanua sa folafolaina iai e le Atua. Ua taunuu folafolaga sa tuu fofoga mai ua faatoilaloina tagata sa nofoia Kanana, ua tatupu le moemoe fou o Isaraelu, ua taulimaina le matupalapala mai le Atua.

5. Isakara (Issachar)
6. Tanu (Dan)
7. Kato (Gad)
8. Asera (Asher)
9. Nafatali (Naphtali)
10. Efaraima (Ephraim)
11. Manase (Manasseh)
12. Peniamina (Benjamin)

O eleele & fanua ole tasi lea o a'oa'oga i le tusi o Iosua. O eleele o Kanana ua foai e le Atua mo Isaraelu male faamoemoe o le Atua ina ia latou tumau pea ile Atua e ala ile tausia o Tulafono ua taialaina ai le ola i aso faisoo. O eleele ua topule e le Atua ia Isaraelu, ua faamau ai lana pule ma ua mautinoa ai le tofi o Isaraelu e autupulagā. O eleele foi ua paologia ai Isaraelu ile paolo ole ola saoloto (freedom). Ua taitasi le ituaiga ma atia'e lona faasinomaga ua foai mai e le Atua. I le vaevaeina o laufanua o Isaraelu sa manino ai foi le pule faa-suli o le ituaiga o Manase. E oo mai i le taimi o Iosua ina ua to le matupalapala mai le lagi. Ua nao suli tama'ita'i o loo iai. Ao tama'ita'i lava ia i le tu ma le aga a Isaraelu e leai tele so latou leo. Peitai, o tama'ita'i ia na lagoa o latou leo ina ua fofola le lafo mo so latou foi fanua. O le mea moni e ui ona o tama'ita'i ae leaga o le suli o le aiga o Isaraelu. O se feau taua foi aua o tatou uma o suli o le aiga o le Atua. O suli tatou te tau ai i le gafa o le Atua, e tatau ai ona tatou savavali e tusa ma le finagalo o le Atua.



1. Reupena (Reuben)
2. Simeona (Simeon)
3. Iuta (Judah)
4. Sepulona (Zebulum)

---

# PEPA MAFUTAGA MATAGALUEGA

---

## LOTOFAGA-LEPA-ALEIPATA

---

### Mataupu 23-24: Upu Faamafanafana a Iosua.

Ua iloa e si toaina o Iosua ua lata ona taimi. O ana upu mulimuli ia Isaraelu, aua lava nei galo i ai latou le alofa o le Atua na afua ai ona latou tau manuia i laufanua o Kanana. O le fautuaga sili lava a Iosua mo Isaraelu, ina ia aua nei o latou suia le tulaga o le Atua o Isaraelu i Atua o Kanana. Fai mai upu na fautuaina ai Iosua, *Tau ina e faamalosi ma loto tele, ia e anaana i tulafono, aua e te alu ese ai i le itu taumatau poo le itu tauagavale.* E faapea foi le lagona o Iosua mo lona nuu o Isaraelu ao lei maliu o ia.

### NISI O A'OA'OGA A IOSUA:

#### 1. Taunuu folafolaga (God fulfill his promises)

Ua lagomau i tiasa Tamā sa tuu fofoga iai e le atua le folafolaga i le nuu e tafe iai le suasusu ma le meli (Kanana). Tuanai le faigamalaga sa a'e i le mauga ma ifo i le vanu, fia aai ma fia feinu, tua i le tomumu ma le faitio. Ao lea ua vavala ata o taulelelia ma ua iite fanualalo ina ua vaايا atumauga ma laufanua o Kanana. Le Atua faamaoni lea, lea ua molimau ai Iosua e ui sa faalogo ai ona taliga ao lea ua vaai tino ona fofoga i le taunuuga o le folafolaga.

#### 2. E tau le Atua mo ona tagata faatuatua (Gof fights for his people)

O le tusi lava ia o Iosua i se manatu faigofie, o le tusi o taua (war). O le faatofalaiga o le toto masaa sa feutana'i ai Isaraelu ma le tele o nuu sa nonofo i Kanana. O le feau a Iosua, e leo se malosi tulagaese ma se atamai faa-militeli ia Isaraelu. Ao le faalia o le mana silisili ese o lo latou Atua moni. Aua se a ea se malosi o le soona leotetele o leo o pu e afua ai ona solo i lalo pa malolosi o Ieriko? (Ios 6:1-21). O ai foi ua fai ma ta'ita'i au ia Iosua ma Isaraelu?? (Ios 8:1). Ao ai foi ua na mafaia ona faatumau le la sei tumau le taimi e tau ai le taua?? Ua nao le atua ma lona malosi ma le silisili ese.

#### 3. E tauia le agasla (Sin will be punished)

O le gagana a le atunuu. "E ifo a le fuiniu i le lapalapa." O le matapu e 7 o loo manino ai le Atua e iai lana faamasinoga amiotonu mo le tagata. O loo faamauina le agasala a Akana ma le tau na tuu iai e le Atua. O le faamoemoe tupito lea o loo naunau ai le Atua mo lona nuu. Ia ola usitai i tulafono aemaise ia tausisia lo latou fai paaga pea ma le Atua. O le faalia o le faamasinoga amiotonu a le Atua ia Akana, e leo le tetee ia Isaraelu poo Kanana. Ao le tetee i le ola agasala ma le le ususitai o Isaraelu.

#### 4. Auaunaga mo le Atua (Serve the Lord).

Manino i upu faafeiloai i le Tusi o Iosua le fesuiaiga o nofoa o auauna e toalua. Ua oti Mose ae seei ane Iosua. O le auaunaga a Mose ua faaauau e Iosua, ao le avea ma auauna ole ave atoa lea o le malosi ma le ola e faaaogaina ma mea faigaluega e galueaina ai le finagalo o le Atua. *"...Ina filifili ia outou i le aso nei po o ai tou te auauna i ai, po o atua sa auauna iai o outou tama, o e sa i le la itu o le vaitafe, po o atua o sa Amori, a'o au nei ma lou aiga matou te auauna i le Alii"* (Ios 24:15)

### Upu Mulimuli

E manatu ua iai foi se sao o Iosua i se feau o le Tala lelei i lenei aso. O le tusi lava ia o Iosua o le tusi o taua. O tatou foi o lo o feagai pea ma taua i aso uma. O le fesili a le pepa. O a mai lou feagai ai ma le taua?? E ila le tino e ila foi le faatuatua. E gase le malosi e tafia foi le ola talitonu. O le faamalosi, aumaia le Atua e fai ma a tatou auupega e taua i le taua. Aua o le mea moni, e saili gata auupega a le tiapolo ae ua maua gofie. E sili gofie auupega ale Atua ae ua maua gata e tau le Atua mo ona tagata faatuatua.

Manuia le mafutaga

### **Saunia:**

**Isamaeli Aulai (FS)**

**Pulega Aleipata**

**Matagaluega Lotofaga-Lepa-Aleipata**

\*\*\*\*\*

---

# "FETU'U TU'UNA'I MUNIAO"

---

Tusi Faitau: Kenese 1:27 & 2:15  
“...na faia e Ia o i laua o le tane ma le fafine” “Ua ave fo’i le tagata e le Ali’i le Atua ua tu’u ia te ia ile fa’atoaga i Etena e galue ai ma leoleo ai.”

E iai le upu Fa’aperetania. “It better to try and fail, than fail to try.” ‘E lelei lou finau ma tauivi, tusa pe fa’afia ona e faiaina, ae leaga lou faiaina, ae e te lei finau’ O Aperā’amo Linikone le Peresitene lona 16 ole Malo o Amerika, le fa’ataitaiga sili o le mau lea. O le tamaloa lea na foafoa mai lona olaga finau mai se aiga faifa’atoaga. O lona tama o Tomasi Linikone ole faifa’atoaga. O le tala’aga ole tagata lea o se tagata finau, tele ia o fa’afitauli na o’o i lona olaga ae lei fa’avaivai ai. Fai mai na maliu fa’afuasei le tamaitai na naunau iai lona loto o Ann i le fiva faiai, na matua ta’eta’ei ai lona fatu, ae lei faiaina ai. E le ititii le fa’aono ona tauva i le tofi Peresitene o le malo tele o Amerika, ma faiaina, ae le uma le finau ma taumafai pea. I le 1861 na toe tauva ai ma manumalo i le tofi Peresitene o le malo o Amerika. Ma ose taitai na matua lauiloa ile lalolagi, i ana mea na fai, aemaise o ana saunoaga (quotes) na tele ina fa’aaoga e isi taitai, aemaise o fanau aoga i Iunivesite.

O le agaga lea e fia fa’ataua e le Muniao, o le tagata e finau ma le lē fa’avaivai, o le tagata manumalo. A’o lea foi ua tatou iloa le finauga a Iakopo ma le Agelu, lea na to ai lona Igagato... ‘E le toe Iakopo fai togafiti, a’o Isaraelu e finau ma manumalo’. E iai le

mea e taua o le Fomula o le manumalo... (Finau ma tauivi + le fa’amaoni (discipline) + Tatalo = manumalo.

O le Autu o lenei Tusiga. “Soia le Ola Fa’avaivai” O le vavao moi tatou uma. Leaga ole ola fa’avaivai, ole mailei a le fili nate fa’aleagaina le lumanai manuia o le tagata. O le uso o paie ma masalosalo, nate taitai le tagata i le ola fa’alotolotolua ma le ola fa’asamasamanoa. O le fa’avaivai, e tua i le mativa ma le ola fa’alolo, e tua i le ‘asamo ma le lima tagovale, e tua i le sa’i ma le ola faitio. A’o le taunu’uga o ia mea uma, o le pagatia ma le fia’ai.

Manatua, e leo foliga Paia ia ole Atua na mamau ai le tagata i le amataga. E le se Atua fa’alua, leai o le Atua galue... Fai mai le tusitala o le Kenese... Ina ua uma ona fai e le Atua le tagata, ona ave lea tu’u i le fa’atoaga, e le tau ina evaeva ai ma fa’asavilivili ai, leai. Ia galue ma finau mo lona lava ola. Ia tauivi e saili manuia ua uma ona fa’ata’oto e le Atua i le manava o le eleele. O le fa’amoemoe o le Atua, ia ola finau ma taumafai le tagata, a lima vaivai, aua le ola fa’avaivai...

Fai mai isi upu a le tusitala o le Kenese... “... na fai e Ia o i laua o le tane ma le fafine.” O le Team Work e galulue fa’atasi e atia’e le aiga. E le ole mafatia o le tina, ae la moe oki oe le tama, po’o le tigaina o le tama a’o la e faitatala solo oe le tina. O le upu a le isi Tama matua o lo matou nu’u... “E le fa’asusua ise apa pinati se pepe, pe fai se lauava ini panikeke, o lona uiga, soia le ola fa’atemeteme.”

O le isi tamaloa, o lana lava masani o le ‘ai i fale ole nu’u, e lana amio e fa’atalitali i lona tuaoi e aumai ai ana mea’ ai. O le isi aso na iloa atu ai e le toeaina lea, ua a’e mai le faiva o tamaiti o le aiga lea, e lua malie lapopo’a. E fa’alogo atu lava le toeaina o fai le fa’atonuga ale tamaloa e ana le fanau. Ia fa’afai’ ai le malie lapo’a. Fa’apea loa mafauaoga o si toeaina lea, oi ua ‘ai foi lana fai’ ai malie i lea afiafi.

Fai loa lana fa’atonuga i lana fanau; “a’ ai outou, ae tu’u ni a’u fasiulu e ‘inai ai lau fai’aimalie”. O le mea na tupu ua galo i le fanau a le tamaloa le tuaoi, ona ave se fai’ ai malie a le toeaina lea. Fa’alogo atu le toeaina, ua pa’o mai ipu ua uma ona ‘a’ ai lona tuaoi, ma ua fa’ata’oto moega, ae lei aumaia lava sana fai’ ai malie.

Alu loa le toeaina lea, ua ita, ua tui luma o lo latou fale, ma vala’au. “Magaia le masina i le fusu, e ola le ‘ai malie, e ola fo’i le le ‘ai malie”. E foliga e malie, ae mataga, ua ita fua ina ua le aumaia sana fai’ ai malie e lona tuaoi. A fia tausami malie, alu e fagota mai sana malie. Ae le o le fa’amoemoe i tuaoi e ola ai. E to’a fia ni Kerisiano fa’apea, o lo’o iai i le Ekalesia. Kama fo’i ie, e fiafia ia Keriso ae le fia amo satauro, e fiafia e ‘asamo i manuia o le Ali’i ae le alolofa moni i le Ali’i. E fiafia i le aumai, ae augata e avatu, e ‘aiu ae potu e ‘aisi. O Keriso lava ia e lei miga, ae na Ia aumai atoa Lona soifua Paia, ina ia magalo i tatou i luma o le Atua.

**Keneti Leupepetele T. (FS)  
EFKS Savaia & Tafagamanu-  
Uta.**

---

# AUMAI AVATU

---

O nei upu e lua, e tatau ona aofia uma i ai mea e fai e le tagata i lona olaga. O ia foi mea e lua, ua fa'avae ai mana'o o le tagata i aso uma o lona olaga. O mea uma lava e te faia, e lua lava ona vaega. O le tasi vaega, o lou mana'o lea ina ia Aumai ia te oe ni mea se tele. A o le tasi vaega, o lou taumafai lea e Avatu ni mea ma nisi. O ia manatu e lua, sei tatou mafaufau mālie i ai ma faatatau ifo i lo tatou olaga, po o fea le itu o tatou matele i ai. O le a tatou iloa ai foi iina le mea moni e ao ina tatou matele i ai, ma tau faatatau ai foi po o le a le finagalo o Iesu i lea mea.

**1. Aumai:** O le toatele o tagata e iai pea lenei manatu. Ia aumai ni mea se tele ma ia. O lona mana'o lava i aso uma, Ia aumai, ma aumai ma toe aumai. Fai mai le Tusi o faataoto. "E toalua afafine o le aluka o loo fai mai, aumai, galuega, ua tagi atu soo i lona matai, ia sii lona totogi. O lona uiga, ua ia te ia pea le manatu, Ia aumai, ma toe aumai. E faapena lava le uiga i soo se mea e te faigaluega ai, po o se Ekalesia po o se mālo, po se kamupani, po o se isi lava faapotopotoga. E peiseai se uiga o le olaga o le tagata, e mana'o pea ia aumai ma saga aumai. A faitauina foi le tusi ua ta'ua o le "Fagu Aitu." (o le tusi lea ua tusia e le alii tusitala tautaua o loo lagomau nei i le mauga i Vailima, o R.L. Stevenson), o le a manino lelei ai, o le agaga o lenā tusi, O le mana'o lava lea o le tagata i lona fia maua o ni mea se tele, a e tagi atu ai pea i le aitu o loo i le fagu aitu, i aumai ma saga aumai le mea ua mana'o i ai o ia.

Ua le gata lenei uiga i le va o le tagata ma le tagata, po o le va foi o le tagata ma mea ua mana'o iai na te fia maua; a ua faapena foi pe a tatou faafeagai ma le Atua. A e mafaufau i le tele o au tatalo e fai i le Atua, ona e iloa lea; o le itu mamafa lava, o lou tagi atu lea, Aumai, aumai, alofa mai. A e puapuagatia, ua e tatalo atu, alofa mai le Atua e, fesoasoani mai le Atua e, Ua faapena soo lava le olaga o le tagata i aso uma; peiseai se mea e masani ai le olaga.

**2. Avatu.** A tatou mafaufau i lenei mea o le Avatu, ona peiseai lea

ua iai sina sui o lo tatou olaga. Ua le tutusa le lagona i le loto e pei ona sa iai i le Aumai. Peiseai ua faale-fiafia i le avatu. Na ona mana'o i le Aumai, a e musu i Avatu. O le a le tau faamalamalamaina lenei mea, auā atonu e iai ia i tatou uma lea uiga, o le faale-fiafia e avatu. O nisi o i tatou ua tagi atu i o tatou pule ia aumai ma fai lelei o totonu totogi; a e a faasaga i le galuega e fai; ua le faamaoni i ai. O lona uiga o lea mea; ua e le fiafia e avatu. Ua na ona e fiafia e aumai, a e le mamafa i lou loto le Avatu. O le lē faamaoni i le galuega, o le le fiafia lea e Avatu. Ile ma lea, a e fia fai se aitalafu, ua e tauanau le Fale-olaoa po le fale-tupe, etc, ma e fai atu: Aumai, aumai, e vave lava ona totogi atu. A e oo loa ina ua e maua le mea na e mana'o ai, ona e solasola lea, a ua e le vave Avatu le totogi o le aitalafu. E moni lava, e te iloa tele ona fai atu, Aumai, a ete musu i Avatu.

**3.** O le Tulaga i le va o mea e lua, o Aumai ma Avatu. Ua tatou iloa nei, o ia mea e lua, ua fai ma uiga o le olaga o le tagata. O le fesili ua tupu mai nei. O fea le itu e ao ina matele i ai le olaga o le tagata e lelei ai? O le Tali, e ao ina matele i le Avatu. O le itu lena e mata o le a faanoanoa ai nisi, ona o le a le feagai le Tali o le fesili ma le mea o loo iai le mana'o o tagata. Ui i lea ua avatu pea le mea ua iloa i le uiga o lenei mafaufauga.

Afai tatou te fia maua se faamaoni o lenei mea, ona tatou vaai faale-maufaufau i le Tusi Paia, ma le uiga moni o le finagalo o le Atua na faaalua mai i le lalolagi i le Alii o Iesu. O le a'oa'oga a Keriso ma lona soifuaga na faamamafaina lava le mataupu, Ia Avatu, ia Avatu. O lona afio mai i le lalolagi, o le foai a le **Atua ua avatu mo oe**. "Auā ua faapea lava ona alofa mai ole Atua i le lalolagi, ua ia aumai ai lona Atalii e toatasi." O mea foi ua tumu i le lalolagi i le laueleele ma le sami ma le vanimonimo, o mea ia a le Atua ua Avatu mo oe ma i tatou uma. A e vaai i fua o au faatoaga, po o ia o le sami ua maua i ou faiva, po o le susulu mai ile la e faafiafia ia te oe; ia e manatua, O le Avatu lea a le Atua ia te oe. Sei o tatou manatua lenei mea

ma teu fatu i o tatou loto, aua lava nei galo.

Atonu ua e iloa lelei le tele o mea lelei ua avatu e le Atua ia te oe; a o le fesili nei. Pe faapefea oe, pei i ai ea ni au mea ua avatu mo le Alii? Pe tele ea foi ni au mea ua avatu i nisi tagata, ona o le faatonuga a le Alii ia faapea ona fai? Ua ia te oe le tali. E lelei pe a toe mafaufau ma iloilo pea au mea ua fai, po o ua e fai foi pe leai. Afai foi ua e avatu, po o tusa ea ma le finagalo o le Alii? O le mataupu iloilo gata lenei i le mafaufau o le tagata. O le a tuu atu ia te oe e tali i ia fesili, a e na ona faamanatu atu ia mea.

Tau o lenei mea ia e manatua. Ua tatou oo nei i le vaitau o le tausaga o faiga taulaga o le Tala Lelei. Ua taufaapotopoto foi au mea na maua i le tausaga. O le a e mafaufau foi i lau faasoa poo le a faapefea ona fai. E faamanatu atu, ia aua nei galo le Avatu. Ua feagai le Ekalesia ma ana faiga taulaga. O le a sau mea ua avatu mo le Alii e ui atu i lau Ekalesia? Nei galo ia te oe; e le toe mamao atu foi ona e faalogo lea i le Aso Kirisimasi o le aso lea e faamanatu ai foi le Avatu a le Atua ia te oe ma au. Tau faaitiiti le mana'o i le Aumai, ae faatele i le Avatu. Aua e te popole i mea ua e fia maua, ua uma ona logo mai e Iesu ia te oe ma ia tatou uma, "Ua silafia ia mea uma e lo outou tama o i le lagi." I le, o le Atua, o le Atua e fiafia pea e avatu, o le Puna o le Avatu atoa foi ma lona finagalo moni: ia tatou ola faapena ma ia matele o tatou olaga i le Avatu. O le poloaiga lava a Iesu i ona so'o. "Ia outou o e fai nuu uma ma soo." O le a lona uiga, e leai se tasi uiga, na o lenei lava, Ia outou o e Avatu. Foai atu lo outou ola mo nisi. Na toe fai mai foi, ou te lei sau ina ia auauna mai tagata ia te a'u, a o au ia ou auauna atu ma foai atu lou ola mo le lalolagi. Ia manatua, o le tasi uiga moni o le satauro ua faapipii nei i falesa ma totonu o tusi, po o soo se mea e te vaai ai le faatusa o le satauro, o lenei lava lona uiga moni. O le Avatu lena, po o le foai a le Keriso mo le lalolagi. Ia manatua, 'aua ne'i matele i le Aumai, a ia loloto lau Avatu.

**Tusia:**  
**Vaalotu Nafai Taulapapa (FS)**  
**Faifeau Penisione**

\*\*\*\*\*

---

# ARETO MO LE AGAGA E TE LAGONA EA LE MAMafa O LE AVEGA?

---

A o lauga atu le faifeau i se tasi aso, sa faalavelave se tasi o le aulotu ia te ia, ua faapea atu: “Ua e lauga so’o mai e uiga i le mamafa o le avega o le agasala, ae leai lava se mea o ou lagona nei. E fia ea lona mamafa? Valu sefulu pauna? Sefulu pauna? Fitu sefulu pauna? E fia ea?” Ona fai atu lea o le faifeau: “Sei e ta’u mai lava, afai e te tu’u atu se avega e tusa o le fa selau pauna i luga o se solofanua

ua pē, na te lagona ea le mamafa o le avega? Fai mai le tali a le taulelea: “E leai, auā ua mate.”

Ona fai mai lea o le faifeau” “Ia e faapena lava le agaga ua oti, na te le lagona le mamafa o le avega o le agasala.

Aisea ua leai ai se afaina o le ola agasala o le to’atele i nei ona po?

E leai se popole i le saga fai ma saga fai pea, Aisea?.....

**Tusia:**

**Iosefa Atapana Uilelea (FT)**

**EFKS Lotofaga**

**Pulega Lepa & Lotofaga**



---

## “INU NEI LAU VAI”

Sa ulufale ane se foma’i Kerisiano e asiasi i si toeaina ma’i tigaina i lona aiga. Sa faia sailiga e le foma’i ma ua faatonu atu ia faalatalata mai le vai-laau mo le ma’i; a faatonu atu loa e aumai ona faapea lea ona fai. Na ave ane le vailaau e pei ona faatonuina. Ua uma ona faia o suesuega, ona tula’i loa lea o le foma’i o le a alu. Ona fesili atu lea o le toeaina ma’i: “Alii, o afea e inu ai la’u vai lenei?” Fai mai le foma’i: “E te le o matua tigaina naua. O le mea lea, sei faatoa inu lau vai pe a atoa le masina e amata mai i le asō.” “Le masina mai le aso,” o le alaga lea a le ma’i. “Aisea? Alii e, e oo atu iai ua ou oti.” “E moni lava a oe, peitai, e te le o matua tigaina nei, e lelei la pe a tuu sei atoa se vaiaso ona faatoa inu lea o lau vai,” o le upu lea a le foma’i. “Alii e, paga,

*ina nei le atoa se vaiaso o ou ola,”* o le leo naunau lea o le toeaina ma’i. Fai mai le foma’i, “*Ia ua lelei, faatu pea la iinei le vai, a e faalogoina loa ua e matua tigaina ma mafatia, ona faatoa e inuina lea o le vai,*” o le faatonuga lea a le foma’i. Ua matua faaletonu tele le toeaina ma’i, o lea na ia toe fai atu ai i le foma’i “Alii e, e le mafai ea ona ou inuina nei lau vai? Ou te le manao e tuu pea seia ou tigaina.” Ona faapea au ai lea o le foma’i ma le agalelei lava, “Ioe, e moni lava a oe, IAAMATA I LE ASŌ. Sa na ona ou mana’o lava e faaali atu ia te oe lou sese tele, o le tuuina ese lea o le vailaau na saunia e Keriso le foma’i sili, mo lou agaga ua matua tigaina i le agasala.

Sei mafaufau, po ua fia aso talu ai o e faatamala i le vailaau na saunia e Iesu mo oe. Ua tausaga o e liliuese pea mai le Alii ma e fai atu i ai: SEI O’O I LEATAUSAGA; SEIA O’O I LEA VAIASO; SEIA OU LATALATA I LE OTI, ONA OU FAATO A SAILI LEA I LE ALII.” Uso e, o le faaolataga ua ofoina mai e le Atua, o le aso lava, fai mai le Afioga a le Atua: “Ia outou saili i le Alii manu o mafai ona maua o Ia.”

Se a la le tonu ua fai i lau vai?

Inu afea?.....INU NEI LAU VAI.

**Tusia:**

**Iosefa Atapana Uilelea FT**

**EFKS Lotofaga,**

**Pulega Lepa & Lotofaga**



# O E UA FAI'ILAGI LE FOLAUGA

## FALELIMA NORA VAEGA PEĪ AATI

18 Me 1929 - 27 Mati 2019

Na soifua mai Nora i le aso 18 o Novema, 1929, i le nuu o Saanapu, a'o faifeau tausi nuu ai ona matua o Faalogou Vaega Saofa'ileta ma le faletua ia Tuitui. Na faamanavaina e le Atua galuega a le tama'ita'i tiakono i le aso 27 Mati 2019. E malii Nora, ua 89 tausaga o lona soifua.

O le galuega a Nora, o le tama'ita'i faia'oga o le malo o Samoa. Na faaiipoipo atu ia Pei Samuelu Limā Aati o Apia. E to'avalu o la alo, ma le la fanau fai e to'a tolu.

O le aofa'i o fanau a le la fanau e to'a 28, ao fanau a fanau o fanau e toa 31. Lona uiga e toa 70 i latou na faafailele ma tutupu mai ia Nora ma Pei. Na tu'umalo Pei i le tausaga 1987, lona uiga ua 32 tausaga o fai e Nora tiute faa-tamā o le aiga, faatasi ma tiute faatinā.

Na ritaea Nora mai lana galuega faafaia'oga i le 1990, lona uiga ua atoa le 60 tausaga o lona soifua, ae masani ona ritaea tagata a le malo i le 55. O Pei ma Nora ma le fanau, o se tasi lea o aiga faavae o lenei aulotu i le tausaga 1965. Na fa'ae'etia le tofia tiakono o

Nora i le aso 31 o Me, 1989. Sa galue Nora i galuega faa-Komiti a lenei aulotu; e pei o le Komiti o le Taulaga, o le Alofa ma Atina'e. Sa avea Nora ma faia'oga Aso Sa mai lava i le amataga o lenei aulotu, faatoa malolo o ia i le faia'oga Aso Sa ina ua fai ma malaga i atunuu i fafo e vaai lana fanau ma a latou fanau. O Nora faatasi ma nisi o le au matutua a lenei aulotu, sa latou faatuina le au talavou. O Nora lava ia o le sui tumau o le Aufaipese, e matua lava Nora ma faasolo ina ma'i e le tu'ulafoaiina lava le Aufaipese.

Sa iai le ofo tumau a Nora male fanau mo le faifeau ma le aiga; latou te faia mālū taeao a le faifeau i aso Sa uma lava. E malii Nora o loo faia pea lea tiute alofa mo le faifeau.

O le isi foi ofo a Nora, ao maua lona malosi, o ia lava e alu i Malua i taimi o Fono e tausi fono. Afai e malaga i fafo Nora, e toe sau lava i le tu lalata i le fono. E lelei le kuka a Nora, toe lufilufi lima lelei.

O se tinā e tautua lotu, e malosi lava fai taulaga. E loto alofa Nora, e molimau i le vaaiga o lana fanau ma a latou fanau, e alofa i ona uso ma ona tuagane ma a latou fanau, e tutusa lona alofa i ona aiga ma aiga o lana tane. O ai foi se tagata e saili mai se apitaga ia Nora, e tatala lava iai e Nora faitotoa o lona fale.

E fiafia e faamasani i ni aiga fou e o mai i le matou aulotu. E aao foai ma aao mafola i mea e faia a le alotu e oo lava i le tausiga o le faifeau ma lona aiga. O se

tinā e laufofoga fiafia, e amio tausaaafia ma e galue fiafia.

Na aveesea mai lona tino malii mai le maota malii o Ligaliga i Malifa i le afiafi o le aso 3 o Aperila, ma faia lona sauniga faaleaiga (Family Service) i le itula e 6.30pm, ma sa ta'ita'ia e le faafeagaiga o Rev Lauitiiti Vaega. O ona toe sauniga na faia lava i le taeao o le aso 4 Aperila, 2019 i le malumalu EFKS Apia-uta. O le ta'ita'i o le sauniga - Rev. Elder Siolo Tauati. Fa'afulafaleina le tino malii - Silipa Silipa AM. Faitauina o le Tusi Paia - Rev Faatausau Onesemo (Faifeau Penisione). Talosaga - Afioga i le Sea, Afa Tyrell (Faifeau Metotisi). Lauga - Susuga Faifeau Toeaina Enefatu Lesa.

### Molimau:

Lafai Aiga Poasa - Sui aiga o Pei Fuafiva Alosina Wulf - sui o le fanau

Afioga Leaupepe Eese Vaega - Sui o Uso

Rev. Siolo Tauati - Faifeau

O sauniga i le tuugamau sa ta'ita'iina e le Faifeau Toeaina Siolo Tauati, ma faatofa atu ai ia Nora i le pese faatofa a le au Kerisiano, Tofa, Tofa, Tofa.

"A o i latou uma e na talia o ia, ma faatuatua i lona suafa, na ia aveatu i ai o lea manuia, ia avea i latou ma fanau a le Atua. (Ioane 1:12)"

Manuia lau malaga, oe le tama'ita'i tiakono Nora.

### **Saunia:**

**Siolo Tauati (FT)**

**EFKS APIA-UTA**



# O E UA FAI'ILAGI LE FOLAUGA

## SAUIMALAE SAVAIINAEA SAMOA SOFARA

17 Oketopa 1935 - 04 Iulai 2019

O le afioga ia Sauimalae Savaiinaea Samoa Sofara o le faletua o le tiakono ma e tusa ai ma faamaumauga a Api o le galuega e sili atu i le 42 tausaga sa la galulue ai i le la Tofi ma lona alii o Samoa Sofara.

O se tinā sa fiafia e tautua ma sa fai ma ana mea suamalie le ola Faa-uauna. Sa faamanuiaina e le Atua i taleni e tele, e fesoasoani i ona faiva alofilima faatinā.

O Sau o le taitai o le mafutaga Tinā ma sa faalagolago ai le mafutaga ma leni ekalesia mo lana tofa faale-Atua

E leai se vaipanoa poo se tofi a le ekalesia e lei oo ai le tautua a Sau.

O le autalavou, aoga aso Sa, aufaipese, mafutaga tinā, faletua o le Tiakono, o itu tino uma ia sa GALUE FAAMAONI ai le susuga ia Sau ma o loo galulue ai pea nisi o ona alo i le taimi leni O Sau e oa i mafauauga lelei. E amanaia lona finagalo e le pulega ma matagaluega

Sau fa'afetai le fautua alofa, ua e maliu lava e le tu'ua lau TU'U-

ALALO i mea e lelei ai le ekalesia, le pulega ma le matagaluega! E te fesili ma toe fa'aioa ma fa'amanatu mai le a-luga o mea e ao ona faia, fa'afetai tele i lou alofa fa'atina." O oe o le auuauna faamaoni... e te finau mo mea lelei, e fiafia e galue i totonu o le lotu e faamoemoe iai lana tofa faale-ATUA.

O Sauimalae "O se tinā e le faigofie i nisi taimi, e tu'usa'o mai lava ona taofi." E naunau i MEA LELEI aemaise mo le ATUA ma lona finagalo

O lou gapatia ma lou agalelei, ua malolosi ai le fanau. O lou ote ua avea ma mea suamalie ma vaimalu, i la tatou MAFUTAGA MAFANAFANA.

O le Falesa i Vailele sa ia fita-ituga ai ma gapatia ai e fai i ai lona sao taua ina ia tu ma faamamaluina mo tapuaiga i le Atua.

Sau e, ua e malolo i le 'Moe' a le kerisiano fa'amaoni, e alafa'i mai i Fa'amanuiaga mo le tagata sa galue tautiga mo Keriso ma lona Finagalo.

Sa taitai le tama o le Pulega ia Enefatu Lesa (FT) i ona toe sauniga i le aso 18 o Iulai 2019. Sa molimoli mai lona sa i totonu mo lona toe sauniga e le susuga ia Petaia Levai (FS). O le Tusi Paia na faitauina e Semikueva Faatoafe (FS), o talosaga o Falenu'u Tagataese (FS), a o le lauga o

Ionatana Te'o (FS). O molimaua le fanau sa saunia e le susuga ia Tutoa ma le molimau a le ekalesia sa saunia e Siasia Salesulu (FS) Sa faaii i lona oliolisaga tumau i lona maota i Vailele Sau, Ia tafi mala lou faigamalaga ma ia maua lou nofoaga tumau i le malo a le lagi.

**Ulufale maia i le fiafia o lou Ali'i. ..ma ia fai mou tofi le Malo ua saunia, talu mai le amataga o le lalolagi.**

Siasia G. Salesulu (FS).


EFKS Vailele

## TOLOA TAPUNUOLENUU AFOA AILEPATA TOTOE PAPUA

19 Iulai 1944 - 02 Aperila 2019

Na soifua mai le tamā i le aso 19/07/1944, ae na faamanava e le Atua ana feau i le aso 02/04/2019 i lona aiga i Lauili. O ona toe sauniga sa faia lava i lana ekalesia e pele sa tautua ma galue ai i Lauili lava. O a'u lava na ta'ita'i ae o le Faafeagaiga a Ulutogia ia Kolia Matamu na faaulufaleina le sa o le tamā, o le susuga i le Epikopo Mamona sa tatalo ae o le Susuga i le Toeaina o le Faapotopotoga a le Atua i Lauili, Patolo Matalasi sa saunoa i le upu faamafanafana mo le fanau ma aiga, uso ma tuafafine o le nuu ma le ekalesia ua tuua ona o le valaau a le Atua. O le atalii ia Tioa Lafi na fai ma sui o le fanau e molimau i le mafutaga ma le tamā, ma sa taua lava le tele o meaalofa a le Atua sa faasoia mai e lo latou tama, aemaise o le osiosina o ona aiga. O ona uso ia Tuiatua Tom

# O E UA FAI'ILAGI LE FOLAUGA



**TOLOA  
TAPUNUOLENUU  
AFOA AILEPATA  
TOTOE PAPUA**

Papua ma Vao Afoa Papua na molimau i le mafutaga ma le uso ma taua ai, o se tagata aumalosi ma galue malosi i le tautuaina o lo latou aiga. O le molimau foi a le tuafafine ia Ake Lemalu, e le se tagata e mana'o e tigaina ma o i se umukuka ona tuafafine. O le afioga i le tiakono ia Tuialii Sua Faofua na fai ma sui o le Aiga Sa Tuialii, na ia taua o se tagata ua afu lana tautua i lo latou aiga, ma o se tagata e toa le loto, e le se tagata e tele ni upu ae o le toa e mafai ai ona saunoa i le tele o mea e fai, auā se a le aogā o le tele o upu ae palaai e oo ina galo uma ia upu, ae maise ua tele galuega ua iloga ai lana tautua. O le susuga i le A'oa'o Fesoasoani ia Tuautu Kalepo na fai ma sui o le Aiga Sa Toloa, na ia taua ai o se tagata foi e tele mea le lelei na ia fai, peitai o se tagata tautua lelei, faaaloalo, ma se tagata aogā i le tele o galuega fai i lona



**FALELIMA  
NORA VAEGA  
PEI AATI**

aiga, i lona nuu ma le ekalesia. O Ifopo ma Tagaolo na fai ma sui o lona aiga i Leusoalii e molimau, ma na taua e Tagaolo, o le tagata sa fai ma sifi e ta'ita'i le vaega leaga, peitai ua liliuina e le Atua ma fai ma tagata aoga mo ana feau. O le Afioga i le Tiakono, o le Afioga foi i le Sao Faapito ia Leniu Vainiu Teo na fai ma sui o lona Aiga Sa Leniu ma sui o le nuu e molimau i le tamā, ma na ia taua o se tagata faamoemoeina ma faatuatuaina i lona tulai mai ae maise ai o galuega tetele na feagai ma le nuu, e pei o le Hall a le aoga Tulaga lua, maketi ma isi, aemaise ai o lana tautua i le nuu e ala i le komiti o le suavai.

O se tiakono foi sa faamoemoeina foi i le ekalesia i le tele o ana galuega sa fai aemaise ai o le galuega faa-le-aufaipese sa galue ma ia umia ai le tofiga Ta'ita'i Pese mo tausaga e tele. Sa fafia lava



**SAUIMALAE  
SAVAIINAEA  
SAMOA  
SOFARA**

foi matou te o i le fono i Malua, ma na silafia e le Susuga i le Toeaina ia Lauina Vui lana galue, ona ia tofia ai lea o Toloa e fai ma Komiti Tumau o le fale o le Pulega. E matua lava o galue i le tautuina o le faamanatuga ma tauaao le faamanatuga mo nai tamā ma tinā matutua o le ekalesia. Na ia talosaga mo se isi la te to'alua i le tauaaoina o le faamanatuga a le au matutua ina ua amata ona faaletonu lana silasila peita'i e le uma le fia galue pea. Amuia lava lea auauana auā e valaau mai le matai ae oloo faapea ona fai. Sa auau lava foi manatu o lona toe sauniga i upu a le poto e faapea "o le tauleleia e sili i le suauu manogi ma le aso e oti ai e sili i le aso e fanau mai ai. O au foi na ta'ita'i i ona toe sauniga i lona oliolisaga tumau ma faamavae atu ai i le pese faatofa a le au Kerisiano Tofa Tamā, ia manuia lau malaga.

**Saunia:  
Pita Toleafoa (FS)  
EFKS Lauili.**